



Юл увер

Волжский районсыо газет. Арня еда лектеш.



2018 ий 4 июль

Волжские вести

№ 27 (888)

• Шарнымаш она

Ўлсола ял калык шарнаш тўнгалеш

**Пуйто лудо-Влак
рат дене
Ўйштылаш Волат.
Тыгерак коеш
эрдене
Шочмо Ўлсола...**

— тыге воза шке почеламутыштыжо шочмо Ўлсола ялже нерген Юлсер кундемын поэт да журналистше Вадим Илларионов. Ила ыле гын, тений тудо кудло ийым тема ыле. Шочым уста поэт лүмеш шарнымаш кас Памар лудмыверыште эрталте, а теве, 29 июньшто, шочмо сурт пырдыжеш ача ден эргыже Вадим Васильевич ден Эдуард Вадимович Илларионов-мыт лүмеш шарнымаш онам сакышт.

Поэт Вадим Илларионовым Кукмарий кундемын шүшпыкшө семын палена гын, Эдик эргыжын лүмжө 2017 ийын мартыште чумыр эл мучко йонгалте. Озан олаште тар заводшто кугу пожар лийме годым тудын вуйлатыме пожарный караул эн ончыч йорташ толын шуын. Эдик Илларионов тулын кугытшым умылен налаш манын, йолташыже-влаклан вучалташ күштен, шкетын йўлышö цехыш пурен, тунамак тар пудешталтын... Шкеже колен, но коллегыж-влакын илышыжым арален коден... Эдик Илларионовым, колымекше, Патырлык орден дене палемдыме.

Шарнымаш онам почмо кечын игече, пуйто шижынак, лыпланыш, шке йўран кава пылпомышыжым «суралыш». Илларионов-мыт сурт воктек икте



почеш весе пошкудыжо, йолташыже-влак, ял калык погынышт. Пайремыш Йошкар-Ола гыч уна-влак, тыгак Озан олесе пожарный часть гыч Эдуардын пырля пашам ыштыше йолташыже-влак толыныт ыле.

Нунылан да ял калык-клан, поэтын ешыжлан саламмутым Пётъял ял шотан илем администраций вуйлатыше Геннадий Романов, район администраций вуйлатышын икымше алмаштышыже Алек-

сей Браслетов ойлышт. Марий книга издательствын директоржо Юрий Соловьев, Марий Эллын калык поэтыше Геннадий Сабанцев шке шарнымашышт дене палдарышт. Чонгыч лекше ой деч вара Юлсер кундемыште, Ўлсола ялыште, эше ик шарнымаш она земляк-влаклан почылто.

Шарнымаш онам почаш надырым Марий Эл Республикын тўвыра, печать да калык-влак пашапшотышто министер-

стве, Юлсер кундем администрацийын тўвыра полкаже да поэтын пелашыже Фаина Сергеевна Илларионова пыштеныт. Ешыж лүм дене Фаина Сергеевна чылалан тауштымо мутшым каласыш.

Омо таче кумылемым нолтыш Пуйто мөнгө

миенам ада-Кукмарий кундемым налым олтыш

Да шупшалыым шокшын авамлак...

Чынак, тиде кечын поэт, журналист Вадим Илларионов пуйто угыч мөнгыжө, шочмо сурт пыжашышкыже, толын савырныш, пошкудыжо-влакым, ешыжым да йолташ-влакшым шке суртышкыжо унала погыш. Герой пожарный Эдуард эргыж дене ончыкыжым шарнымаш она гыч ял калыкым, эртен кайышым порын вашлийың ужаташ тўнгалыт. А Ўлсола ял калык нуным, ача ден эргым, эре шарнаш тўнгалеш манын, ўшанен кодына.

Ю.ИВАНОВА.

Күтүчө

Шошо кечын мый лектым уремыш, Ял шенгелне яктерлам ужам. Пуйто колын йонтыдо муремым, Семала, ўжеш шкеж дек, шижам. Тушто лийын йочам годым олык, Аркалаште снеге чеверген. Саламлен эр кече — чевер солык, А кас кече мөнгө ужатен.

Курык валне кушшо кугу пүнчө Вашлиеш тунамсе семынак. Тыште коштым мый, изи күтүчө, Кодыныт чыла шарнаш гына. Сер воктене шыргыжыт чача-влак, Да вўчка чонемым кайык йўк. Ошкылам шўшкен изи йочала. Олыкышто каналта күтү.

А күтүчө ночко шўргым ўштыл Воштылале: «Тол, пырля ушнет!» Каныш кече... Кодамак күтүштө, — Самырык күтүчө. Да студент.

xxx

Шўмем гыч тый Йоратымаш шижмашым подыл, Ончал-ян шинчашкем. Ончал тура, шыман. Ончал, кузе эше нигө ончалын огыл, Шинчатын келгытше келша мылам. Ончал, ит лук шомакым кеч, Ит пу вашмутым... Шинчатше — теңыз, Тушто йўштылам мый пуйто. Ончал тура, шыман... Но икте деч лўдам: Пурен йомам гын кенета, Кузе лектам?

Вадим Илларионов.

